

四庫全書

子部

欽定四庫全書

冊府元龜卷二十八

宋 王欽若等 撰

帝王部

奉先

傳曰慎終追遠民德歸厚矣孟子曰君子不以天下儉其親故王者富有四海風化兆庶莫不推因心之孝奉如在之靈聚昭穆而舉禘祫祖有功而宗有德申嚴配於上帝飭廟貌於都邑脩奉陵寢追述徽烈潔粢豐盛

作樂陳舞順時序而薦享率諸侯以助祭于以見滌濯
靜嘉肅雍顯相烝烝之義罄乃明馨穰穰之福降於盼
嚮至於親行祭弔祇載神主緬懷里社益樹枌榆斯又
尊尊之至昭明策書者也

有虞氏禘黃帝而郊饗祖顓頊而宗堯

禘郊祖廟謂祭禮以配食也有

虞以前尚德故配用有德者臣欽若等按史記舜名重華父曰瞽瞍瞽瞍父曰螭牛螭牛父曰句望句望父曰敬康敬康父曰窮蟬窮蟬父曰帝顓頊顓頊父曰昌意昌意父曰黃帝自黃帝至舜凡九世也

夏后氏禘黃帝而郊饗祖顓頊而宗禹

夏氏以下稍用其姓代之臣欽

若等按史記禹之父曰顓頊殷人禘饗而郊冥祖契而宗湯臣
曰蘇繇之父曰顓頊若按史記帝嚳生契為殷祖自契之至冥六世也
也實為司玄勤其官事死於水中殷人郊之

太甲脩德諸侯咸歸故稱太宗

太戊時殷復興諸侯歸之故稱中宗

祖庚時嘉武丁之以祥雉為德立其廟為高宗遂作高
宗彤日及訓武丁脩政行德天下咸驩殷道復興故商
頌那祀高祖成湯也烈祖祀中宗也玄鳥殷武祀高宗
也長發大禘也

周文王之祭也事死者如事生思死者如不欲生忌日

必哀稱諱如見親祀之忠也如見親之所愛

思死者如不欲生言

思親之深也

武王立追尊古公為太王季歷為王季九年上祭於畢

一作十一年東觀兵至於孟津為文王木主載以車中

畢文王墓也

軍武王自稱太子發言奉文王以伐不敢自尊也十一年王既克殷

一作十三年

柴於上帝祈於社設奠於牧室遂

率天下諸侯執豆籩逡奔走追王太王曾父王季歷文

王昌不以卑臨尊也上治祖禰尊尊也下治子孫親親也旁治昆弟合族以食序以昭穆別之以禮義人道竭矣

成王即位周公相王王道大洽制禮作樂禘饗而郊稷祖文王而宗武王郊祀后稷以配天宗祀文王於明堂以配上帝四海之內各以其職來助祭故周頌思文后稷配天也天作祀先王先公也清廟祀文王也我將祀文王於明堂也執競祀武王也豐年秋冬報也有瞽始

作樂而合乎祖也潛季冬薦魚春獻鮪也雖禘太祖也大雅生民尊祖也后稷生於姜嫄文武之功起於后稷故推以配天焉其詩曰后稷肇祀庶無罪悔以迄于今王既即政以朝享之禮告於祖廟故周頌閔予小子嗣王朝於廟也烈文諸侯助祭也載見諸侯始見於武王廟也訪落嗣王謀於廟也王既在新邑烝祭歲文王駢牛一武王駢牛一王命作冊逸祝冊惟告周公其後王賓殺裡咸格王入太室裸

漢高帝五年二月追尊先媼曰昭靈夫人十年八月令諸侯王皆立太上皇廟於國都

惠帝以高祖十二年五月即位上高祖尊號曰高皇帝令郡國諸侯王立高祖廟是年帝為東朝長樂宮及間往數蹕煩民作複道方築武庫南奉常叔孫通奏事因請間曰陛下何自築複道高帝寢衣冠月出游高廟子孫奈何乘宗廟道上行哉帝懼曰急壞之通曰人主無過舉今已作百姓皆知之矣願陛下為原廟渭北衣冠

月出游之益廣宗廟大孝之本帝乃詔有司立原廟帝常出游離宮叔孫通曰古者有春嘗果方今櫻桃熟可獻願陛下出因取櫻桃獻宗廟帝許之

文帝以高后八年閏九月即位前元年十月辛亥見於高廟

景帝元年十月詔曰蓋聞古者祖有功宗有德制禮樂各有繇歌者所以發德也舞者所以明功也高廟酎奏武德文始五行之舞

武德高祖所作也文始舜舞也五行周舞也武德者其舞人執干戚

文始舞執羽籥五行舞
冠冕衣服法五行色也

孝憲廟耐奏文始五行之舞孝文

皇帝臨天下通闕梁不異遠方除誹謗去肉刑賞賜長
老收恤孤獨以遂羣生減嗜欲不受獻罪人不孥不誅
亡罪不私其利也除宮刑出美人重絕人之世也朕既
不敏弗能勝識此皆上世之所不及而孝文皇帝親行
之德厚侔天地利澤施四海靡不獲福明象乎日月而
廟樂不稱朕甚懼焉其為孝文皇帝廟為昭德之舞以
明休德然後祖宗之功德施於萬世永永無窮朕甚嘉

之其與丞相列侯中二千石禮官具禮儀奏丞相臣嘉
等奏曰

申屠嘉也

陛下永思孝道立昭德之舞以明孝文皇

帝之盛德皆臣等愚所不及臣謹議曰功莫大於高皇帝
德莫盛於孝文皇帝高皇帝廟宜為帝者太祖之廟孝
文皇帝廟宜為帝者太宗之廟天子宜世世獻祖宗之
廟郡國諸侯宜各為孝文皇帝立太宗之廟諸侯王列
侯使者侍祠天子所獻祖宗之廟請布天下制曰可
武帝元封五年三月祀高祖於明堂以配上帝

太始四年三月壬午祀高祖於明堂以配上帝癸巳祀孝景皇帝於明堂

昭帝以後元二年二月即位謁高廟七月尊趙婕妤為

皇太后起雲陵

婕妤好先葬于雲陽就雲陽為起雲陵

始元元年夏又為太后起園廟雲陽陵

三年秋募民徙雲陵四年六月徙三輔富人雲陵賜錢

戶十萬

元鳳四年正月丁亥帝加元服見於高廟

宣帝以元平元年七月即位謁高廟

本始元年六月詔曰故皇太子在湖未有號謚

湖縣名太子死

於湖因即葬焉歲時祠其議謚置園邑有司奏請禮為人後者

為之子也故降其父母不得祭尊祖之義也陛下為孝昭帝後承祖宗之祀制禮不踰閑謹行視孝昭帝所為故皇太子起位在湖史良娣冢在博望苑北親史皇孫位在廣明郭北謚法曰謚者行之迹也愚以為親謚宜曰悼皇母曰悼后此諸侯王園置奉邑三百家故皇太子

謚曰戾置奉邑二百家史良娣曰戾夫人置守冢三十家園置長丞周衛奉守如法以湖闔鄉邪里聚為戾園長安白亭東為戾后園廣明成鄉為悼園皆改葬焉

二年六月庚午尊孝武廟為世宗廟武帝巡狩所幸之郡國皆立廟焉初帝欲褒先帝詔丞相御史曰朕以眇身蒙遺德承聖業奉宗廟夙夜惟念孝武皇帝躬仁義厲威武北征匈奴單于遠遁南平氐羌昆明甌駱兩越東定濊貉朝鮮廓地斥境立郡縣百蠻率服款塞自至

珍貢陳於宗廟協音律造樂歌薦上帝封太山立明堂
改正朔易服色明開聖緒尊賢顯功興滅繼絕褒周後
備天地之禮廣道術之路上天報貺符瑞並應寶鼎出
白麟獲海効鉅魚神人並見山稱萬歲功德茂盛不能
盡宣而廟樂未稱朕甚悼焉其與列侯二千石博士議
有司遂請尊孝武帝廟為世祖廟奏盛德文始五行之
舞天子世世獻以明盛德武帝巡狩所幸郡國凡四
十九皆立廟如高祖太宗焉

元康元年五月立皇考廟益奉明園戶為奉明縣

廣明縣也

時有司復言禮父為士子為天子祭以天子悼園宜稱尊號曰皇考立廟因園為寢以時薦享焉益奉明園民滿千六百家以為奉明縣尊戾夫人曰戾后置園奉邑及益戾園各滿三百家又改葬衛后追謚曰思后置園邑三百家長丞周衛奉守焉

元帝以黃龍元年十二月癸巳即位謁高廟建昭五年六月庚申復戾園

七月庚子復太上皇寢園原廟

高祖已自有廟在長安城中惠帝更于渭北作

廟謂之原廟

昭靈后武安王昭哀后衛思后園

昭靈后高祖母也武安王

高祖兄也哀后高祖妹也衛后庾太子母也

竟寧元年三月癸未復孝惠皇帝寢廟園孝文太后孝

昭太后寢園初永光四年九月罷衛思后園及庾園十

月罷祖宗廟在郡國者諸陵分屬三輔五年十二月毀

太上皇孝惠皇帝寢廟園建昭元年冬罷孝文太后孝

昭太后寢園先是貢禹奏言古者天子七廟今孝惠孝

景廟親盡宜毀及郡國廟不應占禮宜正定天子是其
議未及施行而禹卒其後丞相韋玄成等議太上孝惠
廟皆親盡宜毀奏可明年玄成復言孝文太后孝
昭太后寢祠園宜如禮勿復修奏可後歲餘帝寢疾夢
祖宗譴罷郡國廟帝少弟楚孝王亦夢焉至是帝疾連
年遂盡復諸所罷寢廟園皆修祀如故

是年五月帝又
毀太上皇孝惠

孝景廟並

太后廟

成帝以竟寧元年六月即位謁高廟

河平元年九月復太上皇寢廟園是時博士平當上書

臣聞孔子曰如有王者必世而後仁

世三十年

三十年之間

道德和洽制禮興樂災害不成禍亂不作今聖漢受命

而王繼體承業二百餘年孜孜不怠政令清矣然風俗

未和陰陽未調災害數見意者大本有不立與何德化

休徵不應之久也禍福不虛必有因而至者焉宜深迹

其道而務脩其本昔者帝堯南面而治先克明峻德以

親九族而化及萬國孝經曰天地之性人為貴人之行

莫大於孝孝莫大於嚴父嚴父莫大於配天則周公其人也夫孝子善述人之志周公既成文王之業而制禮作樂修嚴父配天之事知文王不欲以子臨父故推而序之上極于后稷以配天此聖人之德亡以加于孝也高皇帝聖德受命有天下尊太上皇猶周文武之追王太王王季也此漢之始祖後嗣所宜尊奉以廣盛德孝之至也書云王稽古建功立事可以永年傳於亡窮

太誓

辭之帝納其言故下詔復太上皇寢廟園

哀帝以綏和二年四月丙午即位謁高廟尊定陶恭王
為恭皇建平二年四月詔曰漢家之制推親親以顯尊
尊定陶恭皇之號不宜復稱定陶立恭皇廟于京師

六月庚申帝太后丁氏喪詔曰朕聞夫婦一體詩云穀

則異室死則同穴

王風
大車

昔季武子成寢杜氏之殯在西

階下請合葬而許之

事見禮記
檀弓篇

附葬之禮自周興焉孔子

曰合葬非古自周公
以來未之有改也

郁郁乎文哉吾從周孝子事亡如

事存帝太后宜起陵恭皇之園遂葬定陶

平帝以元壽二年九月辛酉即位謁高廟元始四年正月郊祭高祖以配天宗祀孝文以配上帝夏尊孝宣廟為中宗孝元廟為高宗世世獻祭

五年正月祫祭明堂諸侯王二十八人列侯百二十人宗室子九百餘人徵助祭

後漢光武建武元年六月即位八月癸丑祀高祖太宗世宗於懷宮

二年正月立高廟於雒陽四時祫祀高祖為太祖文帝

為太宗武帝為世宗如舊餘帝四時春以正月夏以四

月秋以七月及臘一歲五祀

光武都雒陽只合祖廟以下至平帝為一廟藏十一

帝主于其中元帝次第八光武第九元帝為祖廟後遵而不改

是年以皇祖皇考墓為

昌陵置陵令守視後改為章陵因以春陵為章陵縣

三年正月辛巳立親廟雒陽祀父南頓君以上至春陵

節侯四廟二月己未以赤眉降祠高廟受傳國璽十月

壬申立春陵祠園廟

五年七月丁丑幸沛祠高祖原廟詔修復西京園陵

六年四月丙子幸長安始謁高廟遂有事十一陵

十年正月脩理長安高廟八月幸長安祠高祖遂有事十一陵

十一年二月己酉幸南陽還幸長陵祠園陵

十五年四月戊申以太牢告祠宗廟

十七年十月甲申幸長陵脩園廟祠又為春陵宗室起祠堂

十八年三月壬午祠高廟遂有事十一陵

十月庚辰幸宣城還祠章陵立考侯康侯廟北園陵置

畜夫

畜夫職本主知賦役多少平其差
品園陵置之知祭祀徵求諸事

詔零陵郡奉祠

節侯戴侯廟以四時及臘歲五祀焉置畜夫佐吏各一

人

十九年正月庚子追尊孝宣皇帝曰中宗始祠昭帝元

帝於太廟成帝哀帝平帝於長安春陵節侯以下四世

於章陵時五官中郎將張純與太僕朱浮奏議禮為人

子事太宗降其私親禮之設施不授之與自得之異意

當除今親廟四孝宣皇帝以孫後祖為父立廟於奉明
曰皇考廟獨羣臣侍祠事下公卿博士議郎大司徒涉
等議宜立平帝哀帝成帝元帝廟奉所代今親廟父祖以
上親入廟兄弟以下使有司祠宜為南頓君立皇考廟
祭上至春陵節侯羣臣奉祠時議有異不著上可涉等
議詔曰以宗廟處所未定且祫祭高廟其成哀平且祠
祭長安故高廟其南陽春陵歲時各且因故園廟祭祠
園廟去太守治所遠者在所令長行太守事侍祠惟孝

宣帝有功德其上尊號曰中宗於是雒陽高廟四時加
祭孝宣孝元五帝其西廟成哀平三帝主四時祭於故
高廟東廟京兆尹侍祠冠衣車服如太常祠陵廟之禮
南頓君以上至節侯皆就園廟南頓君稱皇考廟鉅鹿
都尉稱皇祖考廟鬱林太守稱皇曾祖考廟節侯稱皇
高祖考廟在所郡縣侍祠

二十二年閏正月幸長安祠高廟遂有事十一陵

二十六年詔張純定祫禘之禮遂以合祭高廟為常

中元元年四月幸長安祀長陵十月甲申使司空告祠
高廟曰高皇帝與羣臣約非劉氏不王呂太后賊害三
趙專王呂氏賴社稷之靈祿產伏誅天命幾墜危朝更
安呂太后不宜配食高廟同祧至尊薄太后母德慈仁
孝文皇帝賢明臨國子孫賴福延祚至今其上薄太后
尊號曰高皇后配食地祇遷呂太后廟主於園四時上
祭

明帝即位以光武皇帝撥亂中興更為起廟上尊號曰

世祖廟

蔡邕表志孝明立世祖廟以明再受命祖有所
之義後嗣遵儉不復改立皆藏主其中聖明所

制一王之法也自執事之吏下至學士莫能知其所以
兩廟之意誠宜具錄本事建武乙未元和丙寅詔書下

宗廟儀及齋令宜入
郊祀志以為典式以元帝於光武為穆故雖非宗不

毀也後遂為常

永平元年正月帝率公卿以下朝於原陵如元會儀

二年正月辛未宗祀光武皇帝於明堂帝及公卿列侯

始服冠冕衣裳玉佩絢屨以行事

漢官儀曰天子冠通天
諸侯王冠遠遊三

公諸侯冠進賢三梁卿大夫尚書二千石博士冠兩梁
二千石以下至小吏冠一梁天子公卿特進諸侯祀天

地明堂皆冠平冕天子十二旒三公九卿諸侯十其纓
如其綬色玄衣纁裳周禮曰王祀昊天上帝則服大裘
而冕祀五帝亦如之三禮圖曰冕以三十升布染而為
之廣八寸長尺六寸前圓後方前下後高有佻伏之形
故謂之冕欲人之位彌高而心彌下故以名焉董巴與
服志曰顯宗初服冕衣裳以祀天地衣裳以玄上纁下
乘輿備文日月星辰十二章三公諸侯用山龍九章卿
以下用華虫七章皆五色采乘輿刺繡公卿以下皆織
成陳留襄邑獻之徐廣輿服注曰漢明帝案古禮備其
服章天子郊廟衣皂上絳下前一幅後四幅衣畫而裳
繡禮記曰古之君子必佩玉君子于玉比德焉天子佩
白玉諸侯佩山玄玉大夫佩水蒼玉世子佩瑜玉周禮屨
人掌王赤舄青絢鄭玄注曰赤舄為冕服之舄也絢屨
鼻頭以青絲飾之三禮圖曰屨複下曰舄其色各隨裳
色

十月甲子西巡狩幸長安祠高廟遂有事於十一陵

三年十月烝祭光武廟

冬祭日烝衆也冬物畢成可祭者衆

初秦文始五

行武德之舞甲子車駕從皇太后幸章陵

十一年閏四月甲午南巡狩幸南陽祠章陵

十五年三月辛卯幸大梁至定陶祠定陶恭王陵

十七年正月當謁元陵夜夢先帝太后如平生歡既寤

悲不能寐即案歷明旦日吉遂率百官及故客上陵其

日降甘露於陵樹帝令百官采取以薦會畢帝從席前

伏御牀視太后鏡奩中物感動悲泣令易脂澤裝具左右皆泣莫能仰視焉是年公卿百官以帝威德懷遠祥物顯應乃並集朝堂奉觴上壽帝曰其敬舉觴太常擇吉日策告宗廟

和帝以章和二年二月壬辰即位三月辛酉有司上奏孝章皇帝崇弘洪業德化普洽垂意黎民留念稼穡文加殊俗武暢方表咸惟人面無思不服巍巍蕩蕩莫與比隆周頌曰於穆清廟肅雍顯相請上尊廟曰肅宗其

進武德之舞制曰可

四月丙子謁高廟丁丑謁世祖廟

永元十年十一月癸卯祠高廟遂有事十一陵九年追謚帝母梁貴人曰恭懷皇后貴人父竦為章德竇后所陷坐誅貴人姊妹以憂卒后養帝為己子及后喪未及葬而梁貴人姊嬀上書陳貴人枉歿之狀太尉張酺司徒劉方司空張奮上奏依光武黜呂太后故事貶太后尊號不宜合葬先帝百官亦多上言者帝手詔曰竇氏

雖不遵法度而太后常自減損朕奉事十年深惟大義
禮臣子無貶尊上之文恩不忍離義不忍虧案前世上
官太后亦無降黜其勿復議於是合葬敬陵帝以貴人
酷歿歛葬禮闕乃改殯於承光宮上尊謚曰恭懷皇后
追服喪制百官縞素與姊大貴人俱葬西陵義比敬園
以竇后配食章帝恭懷后別就陵寢祭之

十五年十月戊申幸章陵祠舊宅園廟

殤帝延平元年三月甲申尊孝和皇帝廟曰穆宗

安帝以延平元年八月癸丑即位九月庚子謁高廟辛

丑謁光武廟

永初元年三月葬清河孝王

王名慶安帝之父也

贈龍旂虎賁

建光元年三月有司上言清河孝王至德淳懿載育明

聖承奉丕祚為郊廟主漢興高皇帝尊父為太上皇宣

帝號父為皇考序昭穆置園邑太宗之義舊章不忘宜

上尊號曰孝德皇皇妣左氏曰孝德皇后祖妣宋貴人

追謚曰敬德皇后乃告祠高廟使司徒持節與大鴻臚

奉策書璽綬清河追上尊號又遣中常侍奉太牢祠典

護禮儀侍中劉珍等及宗室列侯皆往會事尊陵曰甘

陵廟曰昭廟置令丞設兵車周衛比章陵復以廣川益

清河園敬德後陵
曰敬北陵

延光三年二月丙子東巡狩丁丑告陳留太守祠南頓

君光武皇帝於濟陽辛卯幸太山癸巳告祠二祖六宗

二祖四宗前已解詔又
孝元高宗孝章肅宗 四月乙丑還宮假於祖禰

十月行幸長安四月乙未祠高廟遂有事十一陵遣使

者祠太上皇於萬年

四年三月庚申幸宛帝不豫令大將軍耿寶行太尉事

祠章陵園廟告長沙零陵太守祠定王節侯鬱林府君

是月安帝晏駕初帝以諛害大臣廢太子及是無上宗之奏後自建武以來無毀者故遂常祭因其陵號稱恭宗也

順帝以延光四年十一月丁巳即位壬申謁高廟癸酉

謁光武廟

永建二年六月己酉追尊謚皇妣李氏為恭愍皇后葬

於恭北陵先是李氏為閻太后鳩殺瘞在雒陽城北帝
初不知莫敢以聞及太后葬左右白之帝感寤發哀親
到瘞所更以禮殯之尊謚于策書金匱藏于世祖廟
三年七月丁酉茂陵園寢災帝縞素避正殿辛亥使太
常王龔持節告祠茂陵

永和元年正月己巳宗祀明堂

二年十月行幸長安十一月丙午祠高廟丁未遂有事
十一陵

漢安元年正月癸巳宗祀明堂

冲帝以建康元年八月即位九月有司奏孝順皇帝弘
秉聖哲龍興統業稽乾則古欽奉鴻烈寬裕宴宴宣恩
以極躬自菲薄以崇玄默遺詔貽約顧念萬國衣無制
新玩好不飾瑩陵損狹不起寢廟遵履前制敬勅有司
孝經曰愛敬盡於事親而德教加于百姓詩云敬慎威儀
惟民之則臣請上尊號曰敬宗廟天子世世獻奉藏主
祫祭進武德之舞如祖宗故事奏可

質帝以永嘉元年正月丁巳即位甲申謁高廟乙酉謁

光武廟

桓帝以本初元年閏六月庚寅以河間孝王孫即位七月辛巳謁高廟光武廟時梁太后攝政以冲質二帝皆不享壽用殤帝故事就陵寢祭凡祠廟命三公分祭之九月戊戌追尊皇祖河間孝王曰孝穆皇夫人趙氏曰

孝穆皇后廟曰清廟陵曰樂成陵皇考蠡吾侯曰孝崇

皇廟曰烈廟陵曰博陵

尊帝母匡氏為博園貴人臣比皆欽若等曰事具帝王尊親門

置令丞使司徒持節奉策書璽綬祠以太牢

建和二年四月丙子封帝弟顧為平原王奉孝崇皇祀
元嘉二年四月甲寅孝崇皇后庾氏喪以帝弟平原王
石為喪主歛以東園畫梓壽器玉匣飯含之具禮儀制
度比恭懷皇后使司徒持節大長秋奉弔祠賻錢四十
萬布四萬疋中謁者僕射典護喪事侍御史護大駕鹵
簿詔安平王豹河間王建渤海王攄長社益陽二長公
主與諸國侯三百里內者及中二千石二千石令長相

皆會葬將作大匠復土繕廟合葬博陵

延熹元年六月丙戌分中山置博陵郡以奉孝崇皇園

陵

博陵城今在瀛州博野縣也後徙安平

二年十月行幸長安甲午祠高廟十一月庚子有事十

一陵

靈帝建寧元年正月庚子即位二月辛酉上孝桓皇帝

尊號廟曰威宗庚午謁高廟辛未謁世祖廟

閏二月甲午追尊皇祖淑為孝元皇夫人夏氏為孝元

皇后陵曰敦陵廟曰靖廟皇考萇為孝仁皇尊夫人董氏為慎園貴人陵曰慎陵廟曰曼廟皆置令丞使司徒持節之河間奉策書璽綬祠以太牢常以歲時遣中常


侍持節之河間奉祠

是時京都四時所祭高廟五主世祖廟七主少帝三陵追尊后三陵

凡牲用十八太牢殷祭之歲出祖廟主皆合于高廟如毀廟三太牢皆有副牲故高廟三主親毀之後亦俱殷祭之歲奉祠自建武以來關西諸陵以轉久遠但特牲祠帝每長安謁諸陵乃太牢祠自雒陽諸陵至靈帝皆以晦望二十四氣伏臘及四時祠廟日上飯太常送用物園令食監典省其親陵所宮人隨鼓漏理被枕具留水

陳嚴具

獻帝興平元年加元服有司奏立長秋宮詔曰朕稟受
不弘遭值禍亂未能紹先以光故典皇母前薨未卜宅
兆禮章有闕中心如結三歲之感蓋不言吉且須其後
初帝母王美人為何皇后所殺於是有詔乃奏追尊王
美人為靈懷皇后改葬文昭陵儀比敬恭二陵初平中
相國董
卓左中郎將蔡邕等以和帝已下功德無殊而有過差
不應為宗及餘非宗者追尊三后皆奏毀之四時所祭
高廟一祖二宗及
近帝四凡十一帝



冊府元龜卷二十八

欽定四庫全書

子部

冊府元龜卷

二十九
三十

詳校官中書臣瞿 照

員外郎臣牛稔文覆勘

總校官庶吉士臣何思鈞

校對官中書臣王 瑄

謄錄監生臣陳 煜

欽定四庫全書

冊府元龜卷二十九

宋王欽若等撰

帝王部

奉先第二

魏文帝黃初元年十一月庚午即位癸酉追尊皇祖太
王曰大皇帝考武王曰武皇帝先是帝為魏王漢獻帝
命王追尊皇祖太尉曰太王臣欽若等曰即曹
嵩也為漢太尉太祖曰
武王至是並追尊號

二年六月甲辰以京師宗廟未成帝親祀武皇帝於建

始殿躬執饋奠如家人之禮

案禮將營宮室宗廟為先庶人無廟故祭于寢帝者

非禮甚矣

四年五月辛酉有司奏造二廟立太皇帝廟大長秋特

進侯

臣欽若等曰即曹騰也為漢中常侍大長秋貴庭侯也

與高祖合祭親盡以

次毀特立武皇帝廟四時享祭為魏太祖萬載不毀也

明帝以黃初七年五月丁巳即位癸未追謚母甄夫人

曰文昭皇后

太和元年正月丁未郊祀武皇帝以配天宗祀文皇帝於明堂以配上帝二月辛巳立文昭皇后寢廟於鄴初甄后賜死故不列廟帝即位有司請追謚曰文昭皇后使司空王朗持節奉策以太牢告祠于陵三公奏曰自古周人始祖后稷又特立廟以祀姜嫄今文昭皇后之於後嗣聖德至化豈有量哉夫以皇家世妃之尊而克讓允恭固推盛位神靈遷化而無寢廟以承享禮非所以報顯德昭孝敬也稽之古制宜依周禮先妣別立寢

廟並奏可四月甲申初營宗廟

三年六月戊申追尊高祖大長秋曰高皇帝夫人吳氏

曰高皇后並在鄴廟之所祠則文帝之高祖處士曾祖

高皇太帝共一廟考太祖武皇帝特一廟

臣欽若等曰處士明帝五

也代祖

十一月宗廟成使太常韓暨持節迎高皇帝太皇帝武

帝文帝神主於鄴

處士以親盡遷主置園也

十二月己丑至奉安神

主於廟先是漢獻帝建安十八年太祖為魏公始建魏

宗廟於鄴自文帝受禪而雒陽宗廟未成黃初末韓暨
為太常奏請迎鄴四廟神主建立雒陽廟四時烝嘗親
奉粢盛崇明正禮廢法淫祀多所規正

四年以文昭甄皇后舊陵庫下使后父嫡孫虎賁中郎
將像兼太尉持節詣鄴昭告后土十二月辛未改葬朝
陽陵

五年詔曰尊嚴祖考所以崇孝表行也追本敬始所以
篤教流化也是以成湯文武實造商周書詩之義追尊

稷契歌頌有娥姜嫄之事明聖德之源流受命所繇興也自我魏承天序既發迹於高皇太皇帝而功隆於武皇文皇帝至於高皇之父處士君潛修德讓行動神明斯乃乾坤所福饗先靈所從來也而精神幽遠號稱罔記非所謂崇孝重本也其令公卿以下會議號謚侍中劉攄議曰聖帝孝孫之欲褒崇先祖誠無量已然親踈之數遠近之降蓋有禮紀所以割斷私情克成公法為萬世式也周王所以上祖后稷者以其佐唐有功名在

祀典故也至於漢氏之初追謚之義不過其父上比周室則大魏發迹自高皇始下論漢氏則追謚之禮不及其祖此誠往代之成法當今之明義也陛下孝思中發情無已已然君舉必書所以慎於禮制也以為追尊之義宜齊高皇而已尚書衛臻與暉議同事遂施行六年四月甲子初進親裸於廟

景初元年六月丁未有司奏武皇帝撥亂反正為魏太祖樂用武始之舞文皇帝應天受命為魏高祖用咸熙

之舞羣公有司始更奏定七廟之制曰大魏三聖相承以成帝業武皇帝肇建洪基撥亂夷險為魏太祖文皇繼天草命應期受禪為魏高祖上集成大命清定華夏興制禮樂宜為魏烈祖於太祖廟北為二祧其左為文帝廟號曰高祖昭祧其右擬明帝號曰烈祖穆祧三祖之廟萬世不毀其餘四廟親盡迭遷一如周后稷文武廟祧之禮

十月乙卯營雒陽宮委粟山為圓丘以曹氏世系出自

有虞氏今以始祖帝舜配號圓丘曰皇皇帝天方丘所祭曰皇皇后地以舜妃伊氏配天郊所祭曰皇天之神以太祖武皇帝配地郊所祭曰皇地之祇以武宣皇后配宗祀皇考高祖文皇帝於明堂以配上帝

十二月壬子冬至始祀皇皇帝天於圓丘以始祖有虞帝舜配

齊王正始六年十一月祫祭太祖廟乙未有司奏文昭皇后立廟京都永傳享祀樂舞與祖同慶在鄴廟嘉平

元年正月甲午謁高平陵

在雒水南大石山
去雒城九十里

晉武帝泰始元年十二月丙寅受禪丁卯追尊皇祖宣
王為宣皇帝伯考景王為景皇帝考文王為文皇帝宣
王妃張氏為宣穆皇后景王夫人羊氏為景皇后初宣
帝為魏太傅晉國初建追尊曰景王文帝為大將軍錄
尚書事封晉王謚曰文王至是皆追尊號

二年正月有司奏置七廟帝重其役詔宜權立一廟於
是羣臣議奏曰上古清廟一宮尊遠神祇逮至周室制

為七廟以辨宗祧聖旨深弘遠跡上世敦崇唐虞舍七廟之繁華尊一宮之遠旨昔舜承堯禪受終於文祖遂陟帝位蓋三十載月正元日又格於文祖遂陟帝位此則虞氏不改唐廟因仍舊宮可依有虞氏故事即用魏廟奏可於是追祭征西將軍豫章府君潁川府君京兆府君臣欽若等按晉書征西將軍鈞生豫章太守量與宣皇帝景皇帝文皇帝為三昭三穆時宣皇升太祖靈位所以六世與景帝為七廟二月丁丑郊祀宣皇帝以配天宗祀文皇帝於明

堂以配上帝七月詔曰主者前奏就魏舊廟誠亦有準然於祇奉明主情猶未安更宜營造于是改創宗廟十

一月己丑追尊景帝夫人夏侯氏為景懷皇后

時任茂以為夏

侯初嬪之時未
有王業帝不從

辛卯遷祖禰神主於太廟

四年七月己卯謁崇陽陵

六年因廟毀改修創羣臣議奏曰古者七廟所自宜如禮又曰古雖七廟自近代以來皆廟七室於禮無廢於情為敘亦隨時之宜也其便仍舊

七年四月帝將親祠車駕夕牲而儀注還不拜詔問其故博士奏歷代相承如此帝曰非致敬宗廟之禮也於是實拜而還遂以為制夕牲必躬臨拜

十年改築太廟於宣陽門內窮極壯麗廟成帝用摯虞議率百官遷神主於新廟自征西以下車服尊從皆如帝者之儀

咸寧元年十二月丁亥追尊宣帝廟曰高祖景帝曰世宗文帝曰太祖二年六月癸丑薦荔枝于太廟

太康元年五月丁卯薦酈淥酒于太廟八年九月改營

太廟

以正月
廟殿階

十年四月太廟成乙巳遷神主於新廟帝

迎於道左遂祫祭

十二月庚寅
太廟梁折

惠帝以太熙元年四月即位五月辛未葬武帝於峻陽

陵廟曰世祖

懷帝以光熙元年十一月庚午即位追尊所生太妃王

氏為皇太后

元帝建武元年三月辛卯即位立宗廟于建康

太興二年正月丁卯崇陽陵毀帝素服哭三日使冠軍將軍梁堪守太常馬龜等脩復山陵迎愍帝梓宮於平陽不尅而退

時劉曜作亂

五月癸丑太陽陵毀帝素服哭三

日是歲有詔瑯琊恭王宜稱皇考賀循議云禮典之義子不敢以已爵加其父號帝從之

三年正月乙卯詔曰吾雖上繼世祖然於懷愍皇帝皆北面稱臣今祠太廟不親執觴酌而令有司行事于情理不安可依禮更處

臣欽若等曰事具禮官奏議門

明帝太寧元年二月葬元帝於建平陵廟曰中宗

三月戊寅朔改元臨軒停饗宴之禮懸而不樂二年正月丁丑帝臨朝停饗宴之禮懸而不樂十二月壬子帝謁建平陵從大祥之禮

成帝以太寧三年閏八月己丑即位上明帝尊謚廟曰肅祖

咸康元年建安郡君荀氏薨詔曰朕少遭閔凶慈訓無量撫育之勤建安君之仁也一旦薨殂實思報復永惟

平昔感痛哀摧其贈豫章郡君別立廟于京都初荀氏
為元帝宮人有寵生明帝及瑯琊王褒及明帝即位封
建安郡君別立第宅太寧元年迎還宮內供奉隆厚成
帝立尊重同於太后故為之立廟

八年三月初以武悼夏皇后配饗武帝廟

康帝以咸康八年六月甲午即位七月丙辰葬成皇帝
於興平陵廟號顯宗

建元元年正月朔晦成恭杜皇后周忌有司奏至尊年

應改服詔曰喪親名教之重也權制出於近代耶於是素服如舊非漢魏之典也

穆帝永和七年九月峻陽陵毀甲辰帝素服臨於太極殿三日遣兼太常趙扶修復山陵

八年二月峻陽崇陽二陵毀戊辰帝臨三日遣殿中都

尉王惠如雒陽以衛五陵

五陵謂宣帝高原陵平陵文帝崇陽陵武帝峻陽陵惠帝

太陽陵也

九年正月丙寅皇太后與帝同拜建平陵八月遣太尉

河間王欽修復五陵十年正月己酉朔帝臨朝以五陵未復懸而不樂十二年十一月遣兼司空散騎常侍車灌龍驤將軍袁真等持節如雒陽修五陵

十二月庚戌以有事於五陵告於太廟帝及羣臣皆服總於太極殿臨三日

升平元年正月壬戌朔帝加元服告於太廟

哀帝以升平元年五月庚申即位七月戊午葬穆皇帝於永平陵廟號孝宗

興寧元年三月壬寅皇太妃周氏薨於瑯琊第癸卯帝
奔喪詔司徒會稽王昱總內外重務

簡文帝咸安元年十二月辛卯初薦酈淥酒於太廟

孝武帝以咸安二年七月乙未即位九月甲寅追尊皇妣
會稽王妃曰順皇后

十月丁卯葬簡文皇帝於高平陵廟號太宗

大元元年正月壬寅帝加元服見於太廟甲子謁建平
等四陵

四年正月丙子謁建平等七陵

謂元帝建平陵明帝武平陵成帝興平陵康帝

崇平陵穆帝永平陵哀帝安平陵簡文帝高平陵

五年正月乙巳謁崇平陵

九年正月辛未謁建平等四陵七月戊戌遣兼司空高密王純之修謁雒陽五陵

十年正月甲午謁諸陵

十六年正月庚申改築太廟九月癸未新廟成正室十四間東西儲各一間合十六間棟高八丈四尺備法駕

遷神主於行廟征西至京兆四主及太孫各用其位之儀服四主不從帝者儀是與太康異也諸王既入廟設脯醢之奠及新廟成神主還室又設脯醢之奠

十九年六月壬子追尊會稽王太妃鄭氏為簡文宣太后詔曰會稽太妃文母之德徽音有融誕載聖明光延於晉先帝追尊聖善朝議不一道以疑屈朕述尊先志常惕於心仰奉遺旨依陽秋二漢孝懷皇帝故事上太妃尊號曰簡文宣太后

初鄭氏為元帝夫人生瑯琊悼王簡文帝末后稱建平國夫人

咸和元年薨簡文帝時為瑯琊王制服重有司以王出繼宜降所生國臣不能親奏免國相諸葛顯王上疏曰亡母生臨臣國沒留國第臣雖出後亦無所厭則私情得叙敬后喪孝王已出繼亦還服重此則朋比臣所憲章也穆皇后不奪其志乃徙瑯琊王為會稽王追號后曰會稽太妃及簡文帝即位未及追尊臨喪封皇子道子為瑯琊王領會稽國奉太妃祀

二十年二月作宣太后廟於太廟路西陵曰嘉平

安帝隆安三年三月己卯追尊所生陳夫人為德皇太后

義熙十二年十月丙寅姚泓將姚先以雒陽降己丑遣

兼司空高密王恢之修謁五陵

恭帝元熙元年正月壬辰朔改元以安帝山陵未厝不

朝會

後魏道武天興元年十二月臨天文殿司徒進璽綬追

尊成帝已下及后號謚樂用皇始之舞以神元皇帝為

始祖臣欽若等按後魏書黃帝以土德王比積六十七世至成帝成及節莊明安宣景元和定僖成獻凡

十二帝獻帝生聖平文皇帝為太祖臣欽若等按後魏武聖武生神元書神元至章平思

昭凡三帝思昭成皇帝為高祖臣欽若等按後魏書平帝生平文文至惠煬烈凡四帝昭

成帝平文皇次子也事具帝王帝考為獻明皇帝臣欽系門其追尊祖始皆從帝謚焉若等

曰獻明即昭成太子也

二年正月甲子初祀上帝於南郊以始祖神元皇帝配

十月太廟成遷神元平文昭成獻明皇帝神主于太廟

歲五祭用二至二分臘牲用太牢嘗以宗正兼太尉率祭官行事又立神元思帝平文

昭成獻明五帝廟於宮中歲四祭用正冬臘九月牲用馬牛各一帝親祭又於

雲中及盛樂神元舊都祀神元以下七帝歲三祭正冬臘牲用馬牛

各一祭官侍祀四年三月帝親漁薦於寢廟

明元永興元年十月壬午即位追尊皇妣劉貴人為宣

穆皇后

二年九月甲寅葬宣武皇帝於盛樂金陵廟號太祖

三年四月謁金陵於盛樂

五年五月幸雲中七月乙巳登薄山觀宣武遊幸刻石

頌德之處乃於其宇起石壇而薦享焉神瑞二年二月

甲辰立太祖廟於白登之西

歲一祭具太宇
帝親之無常月

又詔郡國

於太祖巡幸行宮之所各立壇祭以太宇

歲一皆收
守侍祀

又

立太祖別廟於宮中

歲四祭用馬牛羊各一

後二年又於白登西

太祖舊遊之處立昭成獻明太祖廟以九月十月之交

帝親祭

牲用馬牛羊

又於雲中盛樂金陵三所各立太祖廟

四時祭官侍祀

泰常四年四月庚辰有事於東廟遠助祭者數百國

五年五月乙酉詔曰宣武皇帝體道得一天縱自然大行大名未盡盛美非所以光揚洪烈垂之無窮也今因啟緯圖始覩尊號天人之義煥然著明其改宣為道更

上尊謚曰道武皇帝以彰靈命之光啟聖德之玄同告
祠郊廟宣於八表

太武以泰常八年十月壬申即位十二月追尊妣為密
皇太后庚子葬明元皇帝於雲中金陵廟號太宗

始光三年六月幸雲中舊宮謁陵廟

神麇三年九月癸卯立密皇太后廟于鄴后杜氏生帝

而薨帝既立追尊號又立廟于鄴

置祀官太常博士齊郎三十餘人侍祀歲

五刺史四時薦祀以魏郡太后所生之邑復其調役後

甘露降於廟庭

太延元年十一月行幸鄴祀密太后

文成興安元年十月戊申即位十一月壬寅追尊皇考

景穆太子為景穆皇帝廟號恭宗皇妣閭氏為恭皇后

臣欽若等曰是年二月南安王
僭立上太武尊謚廟號世宗

大安元年正月辛酉奉世宗恭宗神主于太廟

獻文以和平六年五月甲辰即位六月丙寅上文成皇

帝尊謚廟號高宗

天安元年三月辛丑奉高宗神主祔於太廟

孝文承明元年六月辛未上太上皇帝尊謚曰獻文皇帝葬于雲中金陵廟號顯宗

七月甲辰追尊皇妣李貴人為憲祖后

太和五年四月己亥行奉方山建永固石室于山上銘
太皇太后終制于金冊

六年十一月帝將親祀七廟詔有司依禮具儀於是羣臣議曰昔有虞親虔祖考來格殷宗躬謁介福迨降大

魏七廟之祭依先朝舊事多不親謁今陛下孝誠發中將思親祀稽合古王禮之常典臣等謹按舊章并採漢魏故事撰祭服冠屨牲牢之具罍洗簋簠俎豆之器百官助祭位次樂官節奏之引升降進退之法別集為拜之儀制可於是帝乃親祭其後四時常祀皆親之

十二年五月壬寅增置彝器於太廟

十四年十月癸酉葬文明太皇太后馮氏于永固陵甲戌車駕謁永固陵甲申再謁

十五年三月甲辰謁永固陵

四月乙丑謁永固陵已外經始明堂改營太廟詔曰祖
有功宗有德自非功德厚者不得擅祖宗之名居三祧
之廟仰惟先朝舊事舛駁不同難以取准今將述尊先
志具詳禮典宜制祖宗之號定將來之法烈祖有創基
之功世祖有開圻之德宜為祖宗百世不遷而遠祖平
文之功未多於昭成然廟號為太祖道武建業之勲未
高於平文廟號為烈祖比功較德以為未允朕今奉遷

道武太祖顯祖為二祧餘者以次而遷

七月乙丑謁永固陵已卯詔議祖宗以道武為太祖臣欽

若等曰是年四月七月日辰俱有乙丑已卯案太和十二年閏九月十八年閏二月即是年閏在五月六月也

八月壬申詔郡國有時果可薦者送京師以供廟饗乙

巳親定禘祫之禮戊午又詔曰明堂太廟並就祖宗配

祭配享於斯備矣白登崢山雞鳴山廟惟遣有司行事

馮宣王誕先王后復因在官長安立廟宜異常等可勅

雍州以時供祭十月庚寅謁永固陵

十一月丁卯以明堂太廟成遷七廟神主于新廟

十六年正月始以太祖配南郊始以孟月祭廟宗祀顯

祖獻文皇帝於明堂以配上帝

禮置載戊申詔曰夫四時享祀人子常道然祭

薦之禮貴賤不同故有邑之君祭以首時無田之士薦以仲月况七廟之重而用中節者哉自須烝嘗之禮頗違舊義今將迎遵往式以此孟月時祠于太廟但朝典初改衆務殷湊無違齋潔遂及於今又按承神饗祖必須擇日今禮律未宣有司或不

知此可勅太常令尅日以聞

九月甲寅朔大序昭穆於明堂祀文明太皇太后於玄

室

帝親為之詞云

十月己亥詔曰夫先王制禮所以經綸萬代貽法後昆
至乃郊天享祖莫不配祭然而有節白登廟者有為而
興昭穆不次故太祖有三層之宇巴陵無方丈之室又
常用季秋躬駕展虔祝禮或有褻慢之失嘉樂頗涉野
合之儀今授衣之旦享祭明堂立冬之始奉烝太廟若
復致齋白登便為一月再駕事成褻瀆廼詳二理謂宜
省一白登之高未若九室之美幃次之華未如清廟之
盛將欲廢彼東山之祀成此二享之敬可勅有司但令

內典神者攝行祭事獻明道武各有廟稱可具依舊式
十八年閏二月甲戌謁永固陵七月戊戌謁金陵八月
庚午謁永固陵十月戊申親告太廟奉遷神主

十九年四月太和廟成五月遷文成皇后馮氏神主於
太和廟

二十三年二月甲戌謁永固陵三月辛卯謁金陵

宣武以太和二十三年四月即位上孝文皇帝尊謚葬
於長陵廟號高祖

六月戊辰追尊皇妣高氏曰文昭皇后

十月丙戌帝謁長陵

遵遺詔孝文皇帝三夫人已下悉免歸家

丁酉有事於太廟

景明元年正月壬寅謁長陵十月丁卯朔謁長陵

二年正月丙辰朔謁長陵

孝明以延昌四年正月丁卯即位二月甲戌上宣武皇

帝尊謚葬於景陵廟號世宗十二月丁卯帝與皇太后

謁景陵

熙平二年七月己巳車駕有事於太廟

幼主釗以武泰元年二月乙卯即位三月甲申上孝明
皇帝尊謚葬於定陵廟曰肅宗

孝莊永安二年三月甲午追尊皇考為文穆皇帝

臣欽若等

按後魏書文穆皇帝即彭城王也

廟號肅祖皇妣李氏為文穆皇后

四月癸未遷肅祖文穆皇帝及文穆皇后神主於太廟

前廢帝普泰元年二月己巳即位四月壬子有事於太

廟

九月癸巳追尊皇考為先帝皇妣王氏為先太妃

臣欽若等

按後魏書先帝即
廣陵惠王羽也

後廢帝中興二年二月辛亥上孝莊皇帝謚曰武懷皇

帝

孝武帝即位以武穆廟諱
改謚孝莊皇帝廟號敬宗

孝武帝

即出帝也

永熙二年正月丁巳追尊皇考為武穆帝

臣欽若等曰武穆帝
即廣平武穆王懷也

太妃馮氏為武穆后妣李氏為皇

太妃

西魏文帝以永熙三年閏十二月即位上孝武皇帝尊
謚殯於草堂佛寺大統元年三月戊申追尊皇考為文

景皇帝

臣欽若等按後魏書
文景即京北王也

皇妣楊氏為后二年十一

月追改始祖神元皇帝為太祖道武為烈祖

廢帝以大統十七年三月即位四月庚辰上文皇帝追
謚葬於永陵

後周閔帝元年正月辛丑即天王位

臣欽若等
曰無年號

追尊皇

考文公為文王皇妣為文后壬寅祠園丘詔曰予本自

神農其於二丘宜作厥主始祖獻侯

臣欽若等按後周
書獻侯名莫耶自

陰山始居遼西啟土遼海肇有邦國其配南北郊文考德符五

運受天明命祖于明堂以配上帝廟為太廟乙巳祠於太廟辛酉又祠太廟

四月壬午謁成陵太祖陵也乙酉還宮丁亥祠太廟七月辛

亥享太廟

明帝以元年九月即皇帝位十一月庚子祠太廟十二月庚午謁成陵癸酉還宮癸亥太廟成

武成元年八月己亥改天王稱皇帝追尊文王為文帝

祖考為德皇帝

臣欽若等按後周書德皇帝諱耽太祖父也

武帝以武成二年四月即位上明皇帝尊謚葬於昭陵廟

保定元年正月戊辰詔曰履端開物實資元后代終成務諒惟宰棟故周文公以上聖之智翼彼姬周爰作六典用光七百自此厥後代失其緒俾巍巍之化歷千祀而莫傳郁郁之風終百王而永墜我太祖文皇帝稟純和之氣挺天縱之英德配乾元功侔造化故能捨末魏之弊風蹈隆周之獻典誕述百官厥用允集所謂乾巡

改而重構豈帝王洪範而已哉朕入嗣大寶思揚休烈

今可班斯禮於太祖廟庭己巳祠太廟班太祖所述六

官馬

臣欽若等曰太祖依周禮六官置百官令班行之

七月己酉追封伯父顯

為邵國公第三伯父雒生為莒國公天和三年五月庚戌祠太廟十月癸亥祠太廟

建德元年三月誅大冢宰宇文護四月庚寅追尊畧陽公為孝閔帝詔曰慎始敬終有國彛典事亡如存哲王通制義崇追遠禮貴尊親故畧陽公至德純粹天姿秀

傑屬魏祚告終寶命將改謳歌允集歷數攸歸上協蒼
靈之慶下昭后祇之錫而禍生肘腋釁起蕭牆白獸噬
駭蒼鷹集殿幽辱神器弑酷乘輿寃結生民毒流寓縣
今泊海澄清氣沆涓蕩追尊之禮宜崇徽號遣太師屬
國公迥尉遲也於南郊上謚曰孝閔皇帝陵曰靜陵

二年正月乙卯祠太廟

四月己亥祠太廟七月己巳祠太廟

三年正月己巳祠太廟

五年六月辛亥祠太廟

六年四月己巳祠太廟

十年戊午改葬德皇帝於冀州帝服總哭于太極殿

宣帝以宣政元年六月即位上武皇帝尊謚葬於孝陵廟
曰高祖七月己巳祠太廟

大象元年正月癸巳祠太廟四月己巳祠太廟

二年正月癸巳祠太廟

靜帝以大象二年五月入居天臺

臣欽若等按後周書
宣帝大象元年二月

傳位於帝居正陽宮
至是遂入居天臺

上宣皇帝尊謚葬於定陵

隋高祖開皇元年二月甲子受禪乙丑追尊皇考桓王
為武元皇帝廟號太祖皇妣呂氏為元明皇后遣兼太
保宇文善兼太尉李詢奉策詣同州告廟兼用女巫同
家人禮奉迎神主歸于京師犧牲尚赤祭用日出改周
氏左社右廟為右社左廟未言始祖又無受命之祧自
高祖以下置四親廟同殿異室一曰皇高祖太原府君
廟二曰皇曾祖康王廟三曰皇祖獻皇廟四曰皇考太

祖武元皇帝廟擬祖遷于上而太祖之廟不毀臣欽若等按隋

書太原太守惠瑕生平原太守烈生寧遠將軍禎生同州刺史桓公忠忠生高祖周末高祖為隋國公詔贈烈為太保康公禎為太傅獻公及高祖為隋王自康公而下並建王爵至是並惠瑕立四廟焉

四年正月己巳有事於太廟

七年正月癸巳有事於太廟

十二年七月己巳有事於太廟

十月壬午有事於太廟至太祖神主前帝流涕嗚咽悲

不自勝

卷二十九
十三年正月壬子親祀武帝

煬帝以仁壽四年七月即位上文皇帝尊謚十月己卯
葬於太陵廟號高祖

大業元年營建雒邑乃於東都固本里北起天經宮以
藏高祖衣冠四時致祭三年六月丁亥詔曰聿追孝享
德莫至焉崇慶寢廟禮之大者然則質文異代損益於
時學滅坑焚經典散逸廟堂制度師說不同所以世數
多少莫能是正連室異宮亦無定準朕獲奉祖宗欽承

景美永惟嚴配思降大典於是詢謀在位博訪儒術咸
以為高祖文皇帝受天明命奄有區夏拯羣黎於四海
草彫弊於百王恤獄緩刑生靈皆遂其性輕徭薄賦比
屋各安其業恢夷宇宙混同車書東漸西被無思不服
南征北怨俱荷來蘇駕毳乘風歷代所弗至編髮左衽
聲教所罕及莫不厥角闕塞頓頽闕庭譯靡絕時書無
虛月韜戈偃武天下晏如嘉瑞休徵表裏禔福猗歟偉
歟無得而名者也朕又聞之德厚者流光治辨者禮緝

是以周之文武漢之高光其典章特立謚號斯重豈非緣情稱述即崇顯之義乎高祖文皇帝宜別建廟宇以彰巍巍之德乃遵月祭用表蒸蒸之懷有司以時創造務合典制又名位既殊禮亦異等天子七廟事著前經諸侯二昭義有差降故其以多為貴王者之禮今可施用貽厥後昆是年有司奏請准前議於東京建立宗廟帝謂秘書監柳彥曰今始祖及二祧已具今後子孫處朕何所又下詔唯議別立高祖之廟屬有行役遂復停

寢九年閏九月己巳幸博陵庚午帝謂侍臣曰朕昔從先朝周旋於此年甫八歲日月不居倏經三紀追惟平昔不可復希言未卒流涕嗚咽侍衛者皆泣下沾襟

冊府元龜卷二十九

欽定四庫全書卷

冊府元龜卷三十

宋 王欽若等 撰

帝王部

奉先第三

唐高祖以隋恭帝義寧元年封唐王二年三月己巳立
四親廟武德元年五月甲子即位六月己卯追尊皇高
祖瀛州府君曰宣簡公皇曾祖司空曰懿王皇祖景王
曰景皇帝廟曰太祖陵曰永康皇祖妣曰景烈皇后皇

考元王曰元帝廟曰世祖陵曰興陵皇妣曰元真皇后

臣欽若等按唐史隋恭帝義寧元年十二月追贈高祖太祖唐襄公為景王考唐仁公為元王二年三月並高祖立四親至是追尊為元帝以上事見帝系門迎神主祔於太廟

六年四月己未幸故宅改名通義宮祭元皇帝于舊寢以元真皇后配享高祖哽咽悲不自勝侍衛莫不獻欵太宗貞觀三年正月戊午有事於太廟

九年五月上太上皇謚曰太武皇帝廟號高祖陵曰獻

陵

七月甲寅增修太廟崇祔弘農府君及高祖神主并舊

四室為六室

臣欽若等按弘農府君太宗之六代祖名重耳仕後魏為弘農太守是歲太宗命有

司詳議廟制八座等奏議依晉宋故事立親廟六從之

十二月庚戌詔曰昔周監二代崇文武之典禮漢紹三

王尊高光之功烈斯固有國之彛訓不刊之令範高祖

太武皇帝聰明神武獻聖狗齊應天順民撥亂反正德

侔造化道濟區夏靖率土之沸騰拯黔首之塗炭一戎

大定四海宅心制治定之禮作功成之樂天地交泰品

物咸寧聲教遐洎休徵雜沓蠻夷戎狄之長輻輳薰街
麟鳳龜龍之祥光映圖史然猶日慎一日推而弗居邁
邃古之鴻名踰前王之至治朕以寡昧丕承景業緬惟
永往攀慕終天思弘尊親之道庶展罔極之志竊惟太
原之地肇基王迹事均豐沛義等宛譙理宜別建寢廟
以彰聖德詳觀漢典抑有成規但先皇遺旨務存儉約
虔奉訓誡無忘啟處宜令禮官與公卿等詳議以聞
十三年正月乙巳朔謁獻陵先日宿衛黃麾仗周衛陵

寢至是質明七廟子孫及諸侯百僚蕃夷君長皆陪列於司馬門內帝至小次降輿號哭入闕門西面再拜慟絕不能興禮畢改服入於寢躬親執饌閱高祖及先后服御之物匍匐床前悲慟左右侍御者莫不歔歔

十六年四月辛亥制每薦新於太廟令太常卿及少卿一人行事十二月令左監門中郎將齊士員將兵衛獻陵乙酉帝召士員至望見而降殿自迎悲咽不已謂從官曰頃屬歲陰道暮情深罔極所備新衣珍饌欲以正

旦奉薦園陵朕若親行便勞扈從三元告始家有吉凶慶慰之禮咸重茲日朕不欲煩勞乃自抑止因命江夏王道宗代行所獻之物並跪授道宗焉

十七年四月十一日帝親謁太廟謝承乾之過

高宗以貞觀二十三年六月即位上文皇帝尊謚廟號太宗陵曰昭陵八月庚子奉太宗神主祔于太廟

永徽元年五月吐火羅國獻大鳥高七尺帝以太宗懷遠所致獻于昭陵仍刻像于陵之內

一年正月丙子親祠太廟及布幣裸獻至太宗仰視

六年正月壬申朔親謁昭陵文武百寮及宗室子孫並陪位帝降輦易服行哭就位再拜擗踊禮畢又改服奉謁寢宮其崇聖宮妃嬪大長公主已下及越趙二國太妃等先於神座左右侍列如平生帝入寢哭踊絕於地進至東階西面再拜號慟久之乃進太牢之饌加珍饈具品引太尉無忌司空勣越王福曹王明左屯衛大將軍程知節並入執爵進俎帝至神座前拜哭奠饌閱先

帝先后衣服拜辭訖行哭出寢北門乃御小輦還行宮
五月辛未以高祖太武皇帝既開基業不可限以常禮
忌日特宜廢務

顯慶元年十月幸鄭州次汜水以先帝於汜水擒竇建
德因平王世充於是刻石立頌以紀功烈帝自為頌文
五年二月乙未帝以每年二月太常卿少卿分行二陵
事重人輕又不備鹵簿威儀有闕乃令三公行事太常
卿少卿為副太常別造鹵簿事訖則納於本司仍著於

令

龍朔二年六月辛酉詔奉常寺每五月六月停教樂以
太宗文皇帝文德皇太后忌月故也

乾封元年六月戊午詔曰朕以寡德嗣守宗祧雖明發
載懷肅恭禋祀踐霜露而興感奉盥洗以增哀每惟宗
廟至敬虔誠裸享而二尊一奠情有未安思草舊章用
崇嚴配管子曰禮者因人之情緣禮而為之節也故三
王五帝禮制不同損益隨時期於適便况罔極之恩既

展於茲辰終身之慕情深于是日豈可以因循經理乖
違誠敬自今已後宗廟薦享爵及簠簋登鉶各宜別奠
其餘牢饌並依常典

咸亨四年令劉仁軌郝處俊修撰國史帝以許敬宗所
紀多不實處俊曰先聖仁恩觸類皆是臣處俊往年宿
衛之日被差腰舉供奉見有三衛誤拂御衣此人怕懼
五情無主先聖謂之曰此間無御史我不為汝作罪過
不須怕懼帝謂處俊曰此亦須入史

五年八月壬辰追尊太祖武皇帝為高祖神堯皇帝太宗文皇帝為太宗文武聖皇帝太穆皇后為太穆神皇后文德皇后為文德聖皇后皇帝稱天皇皇后稱天后以避先帝先后之稱

儀鳳二年五月壬戌詔尊宣皇帝陵為建昌陵先皇帝

陵為延陵

臣欽若等曰宣皇帝即高宗六代祖也武德初進謚宣簡公先皇帝五代祖也武德初尊

謚懿王至是俱尊為帝

中宗以弘道元年十二月即位上天皇大帝尊謚廟號

高宗葬乾陵

神龍元年正月復位改享德廟依舊為京太廟

臣欽若等曰初

武后革命改京太廟為享德廟至是復焉五月壬午遷武氏七廟主于西京

崇尊廟

崇尊武氏太廟

東都創置太廟

八月乙亥崇祔太祖景皇帝獻祖光皇帝代祖元皇帝

高祖神堯皇帝太宗文武聖皇帝皇考高宗天皇大帝

皇兄義宗孝敬皇帝於東都太廟禮畢即日還宮

十二月上則天皇后謚曰則天大聖后

睿宗唐隆元年六月即位七月庚辰追尊則天大聖皇后依舊為天后

景雲元年十月復追尊天后為大聖天后

十一月己酉葬中宗孝和皇帝於定陵帝思中宗之德乃為紀聖頌以揚其徽範命有司刻之于石初中宗以皇兄義宗孝敬皇帝祔太廟第七室至是中書令姚元之等奏於東都別立義宗廟祔中宗孝和皇帝和思皇后趙氏神主於太廟

太極元年正月辛未朔有事於太廟

延和元年六月乙卯追尊大聖天后為聖帝天后

玄宗先天元年八月即位十月丁酉太上皇詔曰昔重
華嗣德格於文祖高密陟后至於神宗蓋所以敬履端
之元申孝享之道皇帝初嗣大寶允膺休命歡洽人靈

慶溢宗社宜躬祇祀典用展肅雍可以今月四日謁享
太廟所司准式庚子帝謁太廟壬寅祔昭成皇后肅明

皇后神主於儀坤廟

臣欽若等按唐書昭成皇后竇氏
玄宗所生母也陵曰靖陵肅明皇

后劉氏玄宗嫡
母也陵曰惠陵

開元二年四月辛未詔曰園陵之地衣冠所遊凡厥有
司罔不祇事禮存則先王是訓禮失則后代何觀欽若
永圖敢忘舊典頃者別致鷹狗供奉山陵至於料度極
多費損况昔誠禽荒既非尋常所用遠惟龍馭每以仁
愛為心彼耕象與耘鳥且增哀慕豈飛蒼而走黃更備
畋獵有乖儀式無益崇嚴載懷虧紊良深悚惕諸陵所
有供奉鷹狗等並宜即停

四年七月己亥上太上皇尊謚曰大聖貞皇帝廟號睿

宗葬橋陵八月壬子勅宜於太廟西街西少府監空園

內別造中宗廟依前隸入太廟署

臣欽若等按唐志禮官議曰孝和皇帝有

中興之功而無後嗣請因殷之陽甲漢之成帝出為別廟從之

肅明皇后神主於儀坤

廟安置

臣欽若等按唐志禮官議曰昭成皇后有大妃之德已配于睿宗肅明皇后無啟母之尊自應

別廟乙巳勅中宗孝和皇帝合別立廟宜修理儀坤廟

隸入太廟署不煩別署官屬

十一月丁亥徙中宗神主於西廟

五年正月癸卯太廟四室壞帝素服避正殿迎神主於
太極殿輟朝五日視事於別殿己酉親享太極殿十月
丙子京師修太廟成戊寅祔神主於太廟

六年十一月辛卯至自東都丙申親謁太廟時有司撰
儀注以祔祭之日車駕發宮中帝謂宰臣宋璟蘇頌曰
祭必先齋必也據儀注祭之日發大明宮又以質明行
事朕便侵星而發猶是移辰方到質明之禮其可及乎
又朕不宿齋宮即安正殿情所不敢宜於廟所設齋宮

五日赴行宮宿齋六日質明行事庶合於禮環等稱聖情深至請即奉行詔有司改定儀其日帝自齋宮步詣太廟入自東門就位樂奏九成升自阼階行裸奠之禮至睿宗室俯伏嗚咽侍臣莫不流涕乃下制曰朕聞禮莫大於孝惟孝所以通神明事莫大於祀惟祀所以謁宗廟顧此薄德獲承丕緒恭虔夙夜弗敢遑寧去歲爰命司空增崇太室尋以匠者功就饗人禮奉雖是効是則率繇典章而不躬不親曷盡誠敬粵自河雒旋於

京師聿修齋祭致用蠲潔屬羣方駿奔庶位咸列裸奠
式受咸懷載殷聖靈在天若享精意伊爾王公卿士下
逮黎蒸道存念茲惠乃錫類

七年五月勅曰五月是齋舊有常式六月緣忌特令斷
屠宜令所司進蔬食府縣捉搦勿令屠宰

十年六月己巳增置京師太廟為九室移孝和皇帝神
主以就正廟下詔曰朕聞王者乘時以設教因事以制
禮沿革以從宜為本取捨以適會為先故損益之道有

殊質文之用甚異且夫至德之謂孝所以通於神明大事之謂祭所以虔於宗廟國家握紀命歷重光累盛四方繇其繼明七代可以觀德朕嗣守丕業祇奉睿圖聿懷昭事罔不恤祀嘗覽古典爰詢廟制遠則殷周事異近則漢晉道殊雖禮文之不一固嚴敬之無二朕以為立愛自親始教人睦立敬自長始教人順是知政以道存禮從時變特因宜以創制豈法古而限今况恩以降殺而踈廟以遷毀而廢雖式瞻古訓禮則不違而永言

孝思情所未足享嘗則止豈愛崇而禮備有禱而祭非
德盛而流永其祧室宜列為正室將使親而不盡遠而
不祧廟以貌在宗由尊立俾四時式薦不間於毀主百
代靡遷匪惟於始廟所謂變以合禮動而得中嚴配之
典克崇肅雍之美茲在又兄弟繼及古有明文今中宗
神主猶居別處詳求故實當守不安移就正廟用彰大
典仍創置九室宜令所司擇日啟告移造

十一年正月行幸北都帝親製起義堂頌刻石紀功于

太原府之南街五月乙丑遷祔中宗神主於太廟

一作四月

丙辰制曰崇建宗廟禮之大者聿追孝饗德莫至焉今宗

以立尊親無遷序永惟嚴配致用蠲潔棟宇式崇裸奠
斯受顧茲薄德獲承禋祀不躬不親曷展誠敬宜用八
月十九日祇見九室

是月戊申尊八代祖宣皇帝號懿祖始祔於太廟之九
室

十七年十一月庚寅親享九廟辛卯發京師丙申謁橋

陵帝望陵涕泣哀感左右奉先縣以所管萬三百戶供奉陵寢曲赦縣內大辟罪已下戊戌謁定陵己亥謁獻陵乙巳謁乾陵戊申還宮

二十一年正月乙巳遷肅明皇后神主于太廟祔睿宗室殿儀坤廟

二十五年七月己卯詔諸陵廟並隸宗正寺其官員悉以宗子為之

二十七年二月己巳詔曰宗廟致敬必先於如在神人

所依無取於非族深惟至理用切因心其應緣太廟五
享於宗子及嗣郡王中揀擇有德望者令攝三公行事
其異姓官吏不須令攝

二十八年七月壬寅尊宣皇帝陵為建初陵先皇帝陵
為啟運陵仍置官員

天寶元年二月甲午親享太廟

以加尊號故也

二年三月制曰涼武昭王朕十一代祖也積德右地炳
靈中葉奄有舊國兆先帝功敬追尊為興聖皇帝其陵

側左近仍並禁樵牧春秋二時備致祭

八月制曰禋祀者所以展誠敬之心薦新者所以申霜露之思是知先王制禮蓋緣情而感時朕承丕業肅恭祀事至於諸節嘗修薦享自流火屆期商風改律載深追遠感物增懷且詩著授衣令存休澣在于臣子猶及恩私恭事園陵未標典式自今以後每至九月一日薦衣於陵寢貽範千載庶展孝思且仲夏端午事無典實傳之淺俗遂乃移風况乎以孝道人因親設教感游衣

於漢紀成獻報於禮文宣示庶寮令知朕意

六載正月丁亥親祠太廟

以戊子祀
圓丘故也

八載閏六月丙寅上高祖神堯皇帝尊謚曰高祖神堯
大聖皇帝太穆皇后竇氏尊謚曰太穆順聖皇后太宗
文武聖皇帝尊謚曰太宗文武大聖皇帝文德聖皇后
長孫氏尊謚曰文德順聖皇后高宗天皇大帝尊謚曰
高宗天皇大聖皇帝大聖則天皇后武氏尊謚曰則天
順聖皇后中宗孝和皇帝尊謚曰中宗孝和大聖皇帝

和思皇后趙氏尊謚曰和思順聖皇后睿宗大聖真皇
帝尊謚曰睿宗玄真大聖皇帝昭成皇后竇氏尊謚曰
昭成順聖皇后肅明皇后劉氏尊謚曰肅明順聖皇后
以來月五日於太清宮聖祖前恭申冊禮宜令所司即
詳定儀注聞奏丁卯詔曰禘祫之禮以存序位質文之
變蓋取隨時國家系本仙家業承聖祖重熙累盛既錫
無疆之休合享登神思弘不易之典自今以後每神並
於太清宮聖祖前設位序正上以明陟配之禮欽若玄

穹下以盡虔恭之誠無違至道比來每緣禘祫時享則
停事雖適於從宜禮或虧於必備已後每緣禘祫其常
享無廢又奉先追遠禮惟昭德崇福展敬義在因心自
今已後獻祖宣皇帝宣莊皇后懿祖光皇帝光懿皇后
忌日宜令京城寺觀一日設齋太祖景皇帝烈皇后代
祖元皇帝元貞皇后忌日京城三日行道

九載十一月己丑制曰春秋致享用存昭敬祝史陳信
必在正辭苟名位之或乖於上下而非便故經稱崇事

易載顯若所以展祗肅明等威朕欽崇道本嗣守丕業
每懷如在之誠敢忘奉先之旨禮或未達情寔匪寧承
前有事宗廟皆稱告享茲乃臨下之辭頗虧尊上之義
靜言斯稱殊未為允自今以後每親告獻太清宮太微
宮改為朝獻有司行事為薦獻親告享宗廟為朝享有
司行事為薦享親巡陵為朝拜有司行事為拜陵應緣
諸事告宗廟者改為奏其郊天后土及祀祝云敢昭告
於者並改為敢昭薦于式崇寧禮庶表因心宣示中外

令知朕意

十載正月癸巳朝享太廟

以甲午有事於南郊故也

十一載三月丙午制今後每月朔望宜令薦食於太廟

每室一牙盤乃五日一開室門灑掃

十三載二月癸酉親享太廟以兩漢諸帝廟號皆有孝字帝王徽號莫大於孝是以上高祖神堯大聖皇帝謚曰高祖神堯大聖大光孝皇帝太宗文武大聖皇帝曰高宗文武大聖大廣孝皇帝高宗天皇大聖皇帝曰高

宗天皇大聖大弘孝皇帝中宗大和大聖皇帝曰中宗

大和大聖大昭孝皇帝睿宗玄真大聖皇帝曰睿宗玄

真大聖大興孝皇帝

是歲改獻昭乾定橋五陵署為臺其署令改為臺令加舊一階

肅宗至德二年十月丁卯入長安先是九廟為賊所焚
帝素服哭於廟三日入大明宮

十二月新作九廟神主於長安殿安置帝親告享流涕
嗚咽感動左右初帝在彭原使人於鳳翔郡採栗木以
作神主備之及是奉迎告享用之

乾元元年四月辛亥九廟神主自長安殿遷入太廟帝備法駕鹵簿警蹕王公百寮從甲寅帝親行享禮

代宗以寶應元年四月即位上文明武德大聖大宣孝皇帝尊謚廟號肅宗陵曰建陵

五月庚寅進冊先妃吳氏為皇太后

三年四月己丑祧獻祖懿祖二室遷太祖己下七室祔玄宗二室五月辛亥以醴泉縣奉建陵昇固赤縣

廣德二年正月丙辰勅以來月七日饗太廟二月甲戌

親享太廟九室

大歷二年四月癸未詔有司陵廟祠祭并三長齋月依舊薦酒肉

七年五月徙忻州七聖廟尊容置於太原之紫極宮
八年五月庚子是日太宗諱日命有司備四千僧齋於
昭成寺十月己酉命有司大祫於廟是日冬享因展禮也
德宗以大歷十四年五月即位八月庚申上睿文孝武
皇帝尊謚廟號代宗葬元陵

十二月己酉祔代宗神主於太廟禮儀使顏真卿奏議

祧元皇帝於西夾堂

建中元年正月庚午謁太廟

以辛未有事於南郊也

三月丙寅禮儀使奏東都太廟闕木主請造詔下議之

初武后於東都立高祖太宗高宗三廟至中宗已後兩京太廟四時並祭至德之亂木主多亡缺未祔於是議者紛然而大旨有三一曰必存其廟遍立羣主時享之日以他官攝行二曰建廟立主存而不祭若皇與時巡則就享之三曰存其廟座或東幸則飾齋車奉京師羣廟之主以往議皆不決而罷

二年二月復肅宗神座于寢宮先是寶應二年西戎犯

京師焚建陵之寢室至是始創復焉

十月癸卯祫饗太廟始奉獻祖神主出行祫禮初寶應二年玄宗肅宗神主祔廟始遷獻祖懿祖神主於西夾室是時禮儀使于休烈以國喪畢將行祫享以太祖既位當東面獻祖懿祖屬尊於太祖若同祫享即太祖不得居正位於是永闕二神主於西夾室至是有司亦以國喪既畢當行祫禮於是大常博士陳京建議請准魏晉以來祫禮奉二主出同祫享與太祖並列昭穆而虛

東向之位又云若以二祖同享謂太祖失尊位即請奉二祖神主於德明皇帝廟祫享詔下尚書省雜議禮儀使顏真卿請依蔡謨等議至祫享之日奉獻祖神主居東面之位自懿祖太祖洎諸祖宗遵左昭右穆之列時宰臣百寮並同真卿之議奏留中不出將及祫享真卿又奏請從蔡謨議為定從之

興元元年十二月甲午詔曰朕一經播遷久曠禮儀不惟霜露之感實貽失墜之憂賴先澤在人上帝臨我克

平大難載復舊京方欲展禮郊丘請罪宗廟而乃股肱
卿士詢謀異同明孝敬之大端陳古今之正義三省章
表深體乃誠以義制心允從衆請予之不德愧歎良深
其來年告謝郊廟百寮請俟後期者可之其元日御含
元殿准式時李懷光李希烈並叛逆不賓京師將士賞
賚未徧人情尚擾不安李晟自鎮上表請權停郊廟之
禮百寮議與晟協故有是詔

貞元五年八月詔天下諸上州並宜國忌日准式行香

九年六月癸亥詔定國忌日寺觀齋僧道人數有差十一月甲寅朝享太廟前一日有勅至廟行禮不得施褥至敬之所自合履地而行

十二年十月辛亥祫祭於太廟

十四年正月詔曰八陵宮寢

臣欽若等曰自高祖至代宗凡八陵久要修

葺此緣日月非便未及興工宜令宗正寺與所司即計料依所擇日速修理初宗正寺奏諸陵宮寢屋宇摧壞及要科剝松栢等勅詔陰陽人楊季炎擇日起修

三月詔曰八陵舊寢宮在山上置來多年曾經野火燒
焚摧毀畧盡其宮尋移在瑤臺寺側左今屬通年欲議
修置緣供水稍遠百姓非常勞弊今欲於見住行宮處
修造異久遠使人又為改移舊制恐所見未周宜令中
書門下及百寮同商量可否聞奏丁丑令昭陵宜修舊
宮先有五間殿依舊基創造寢殿五間餘舍屋准圖起
造初正月中令有司修葺陵寢以昭陵舊宮先因火焚
毀百官詳議而議者多云修舊宮帝意欲遷移繇是以

山下為定於是遣右諫議大夫平章事崔瑗充修八陵使及所司計料獻昭乾定泰五陵各造屋三百七十八間橋陵一百四十間元陵三十間惟建陵不復創造但修葺而已所緣陵寢中惟牀褥一事已上並令創造帝親加閱視然後遣送赴陵所八月以修八陵畢廢朝一日羣臣於宣政殿前橫行稱賀中尉第五守亮宣詔曰朕獲主宗祀以奉園陵歲月滋深是有崇飾今修奉既畢感慕增懷所賀知

十五年二月丁亥不視事以公卿等朝拜諸陵循親規

制也

初是月七日拜陵官發其日本不視事適會董晉卒廢朝至十六年二月公卿拜陵發已遂不視事

迄今便因循行此禮時謂不經無據也

五月壬戌不視事以逼先帝忌故

也

十六年二月辛未不視朝以拜陵公卿辭故也

十九年四月壬辰修德明興聖獻祖廟甲午詔曰奉遷

獻祖懿祖神主太祖景皇帝正東向之位虔告之禮當

在重臣宜令檢校司空平章事杜佑攝太尉告於太清

宮門下侍郎平章事崔瑗攝太尉告太廟詔曰國之大事式在於明禋王者孝享莫重於殷祭所以尊祖而正昭穆也朕承列聖之休德荷上天之賚命虔奉牲帛二十有五年永惟宗廟之位禘嘗之序夙夜祇慄不敢自專是用延訪公卿稽叅典禮博考羣議至于再三敬以令辰奉遷獻祖宣皇帝神主懿祖光皇帝神主祔于明德興聖皇帝廟太祖景皇帝正東向之位宜令有司備禮務極嚴重祇肅祀典載深感惕咨爾中外宜悉朕懷丙

申奉遷獻祖懿祖神主祔於明德興聖廟文武三品已
上官序位於廟廷宗子諸親咸陪列焉門下侍郎平章
事崔瑱攝司徒從金輅至行廟升座畢奠用脯酒稱官
跪奏安神退戊戌帝不視事宰臣及百官以祔廟禮畢
蹈舞賀於宣政殿前

憲宗永貞元年九月丁卯上神武孝文皇帝尊謚廟號
德宗葬崇陵十一月冊謚德宗母沈氏曰睿貞皇后奉
神主祔於代宗之室

元和元年七月上至德大安孝皇帝尊謚廟號順宗葬豐陵以奉先縣神泉鄉櫟陽縣大澤鄉美原縣義林鄉並隸富平縣以奉豐陵

二年正月庚寅朝享于太廟初次諸室帝皆盡於敬誠至德宗順宗室帝流涕嗚咽若不自勝侍臣及奉冊讀冊官皆相顧感泣

穆宗以元和十五年正月即位五月上聖神章武孝皇帝尊謚廟曰憲宗葬景陵以美原縣龍原鄉櫟陽縣萬

年鄉並移隸奉先縣以奉陵寢七月歛州奏當州有玄宗皇帝真容在開元寺去城十里今請移於郭內龍興寺仍交換寺額制可之

長慶元年正月己亥朔備法駕親薦獻於太清宮遂齋於太廟庚子享太廟至順宗憲宗二室上歔歔流涕侍臣從官皆感動禮畢復齋於郊壇行宮

敬宗以長慶四年正月即位上睿聖文惠孝皇帝尊謚廟號穆宗葬光陵勅富平縣宜割豐水鄉華州下邽縣

割翟公鄉同州澄城縣割撫道鄉白水縣割會賓鄉以

奉陵寢

寶歷元年正月庚戌謁太廟

以辛亥有事於南郊故也

七月辛亥勅奉先一縣獨奉八陵供辦支持實為繁併
眷言物力須議優矜宜委京兆府減一半租并雜色役
等令諸縣均出

文宗以寶應二年十二月即位上睿武昭愍孝皇帝廟
號敬宗葬莊陵

太和元年四月禮儀使奏拆修太廟西夾室遷移神主五位得大卜署令狀擇用四月二十四日吉其日光出室內先祧遷神主五位入幕殿便起首拆修至五月五日畢功六日却移神主入室詔依

五月京兆府奏莊陵准穆宗陵例割鄰近縣鄉奉陵供應今高陵縣萬福鄉富陵縣從化鄉雲陽縣善化鄉涇陽縣嘗樂鄉其界並不隔越伏准穆宗陵例合割前件四鄉屬三原縣添奉陵寢從之

三年十一月癸巳謁太廟

以甲午有事於南郊故也

五年五月戊戌朔辛丑宗正寺奏太廟第四室第六室破漏四月九日已具聞奏訖有司不時興工至今稽滯勅太廟或要修葺有司合星夜興工以涉稽滯須有懲責將作監王堪宜罰兩月俸料度支判官罰一月俸料宗正卿李銑奏報稍晚量罰一月俸帝遽命中人令領工徒以禁中即日修營材木修葺左補闕韋溫上䟽極諫䟽奏帝甚嘉納繇是追止中人命有司嚴加修奉甲

寅宗正等請修獻陵乾陵定陵橋陵泰陵建陵元陵崇陵豐陵景陵光陵莊陵惠陵昭陵詔曰所修陵寢事至嚴重簡計崇飾須得精實宜令度支郎中盧商將作少監韋長同往諸陵子細簡計具合修與不合處聞奏

八年正月丙寅修太廟以太常卿庾承宣攝太尉徧告九室遷神主於便殿

五月甲寅詔曰忌辰修齋雖出近制斟酌損益貴於得中況在不遷之宗允資異數之禮五月六日二十六日

兩忌設齋人數宜各加至二千人太穆文德皇后忌日亦宜各加倍數其寺觀仍舊十二月八日忌宜於五所寺觀共設四千人宜令所司准式已已修太廟畢以吏部尚書令狐楚攝太尉遍告神主却復正殿


開成元年七月丙戌監察御史請修太廟祭器初帝言於宰臣曰宗廟之事朕合自行千乘萬騎動資國用每至有事之日朕被冠冕危坐待旦比聞有司發饌不精酒醴酸濁卿當宣諭監察御史俾之臨祭勿有不虔御

史崔黯監察受宣遂有此奏

四年三月己卯帝御紫宸殿宰臣楊嗣復奏曰太廟准禮三年一禘五年一禘今是禘祭時讓皇帝廟亦合禘祭臣案讓帝本封寧王玄宗親兄玄宗既定內難寧王能讓帝位玄宗感之贈以鴻名其復置廟享獻禘祫與九廟同至上元二年杜鴻漸奏停時享而禘祫存今玄宗肅宗神主已歸夾室讓皇帝猶禘祫不闕於禮未安李班曰宗廟事重比者臣不敢輕議帝王至今禘祫實

不當禮嗣復所論至當今請下禮官議帝曰俞四月壬戌帝御紫宸殿問宰臣曰皇城使上言太廟中有麇走出安有宗廟之中得此野獸宰臣請宣示宗正寺使令巡簡帝曰可召宗正卿來朕自戒勵之遂召宗正卿李踐方至帝曰宗廟至重卿宜恪勤官業勿俾太廟有所壞隳勿拘陰陽不旋修葺漢有昭陽未央尚猶崇飾潔况宗廟乎無長蒿萊以藏野獸言訖泣然踐方叩頭請罪久之帝自即位宗廟祀事未嘗不戒勵有司俾其嚴

潔詩云祀事孔明其此之謂乎



冊府元龜卷三十